

Despues di 5 año di trabao

Dinah Veeris cu buki di remedi y costumber di nos bieunan

ORANJESTAD(AAN) -- Awendia asina un hende bira malo, e ta core bay dokter pa asina haya medicina. Tin biaha un persona ariba su mes ta bay botica pa cumpra remedi pa cura.

Pa un simpel dolor di cabez of di barica, ta guli pildora pa alivia e dolor.

Antes no tabata asina. Den tempo bieu e ama di cas tabata tin su yerba na man pa den caso di un verkoud, malo di stoma o cualkier dolor trek te di yerba y laga e paciente bebe.

E por ta zona milagroso pero den mayoria di e casonan e "remedi di cas" ta yuda.

Durante un entrevista cu autor di e buki "Remedi y Costumber di nos Bieunan", Dinah Veeris, el a splica cu

for di 1982 e taba haci investigacionnan riba tereno di yerba medicinal y ta purba conserva secreto di yerba cu bieunan tabata sa pa esakinan no bay perdi. E investigacion a tuma lugar na Aruba, Curacao y Bonaire.

Na año 1986 Veeris a sigui un curso den ramo di yerba na "California School of Herbal Studies".

Den e buki "Remedi y Costumber di nos Bieunan", Veeris a trata mas cu cien yerba y algun remedi.

Na comienso di e buki, Veeris ta familiarisa e lesado cu algun informacion di desaroyo di yerba, definicion y clasificacion di nomber y regla pa uso di yerba.

Den e segundo parti, na un manera unico, e ta trata cada yerba. E ta describi e yer-

banan, conta nan historia y trece dilanti con nos grandinan tabata usa yerba pa remedi.

Dinah Veeris a manifesta cu tabata un experiencia dushi pa colecta datonan di hende grandi. Mas ainda e tabata gusta bay den mondi cu e grandinan pa siña con cocoe e yerbanan.

E ancianonan a siña Veeris con pa reconoce e mata na su forma, color y holor. Tambe nan a siña Veeris con pa prepara nan.

Pa laga nan merito riba e tereno aki bin dilanti, Veeris a pone potret di esnan cu a suministre informacion, hunto cu algun dato di nan bida.

Den e buki Dinah Veeris a inclui un cantidad di endeks y listanan cu ta facilita entrada y buscamiento den e buki di diferente scina pa por haci e buki mas util pa diferente clase di interesado.


Na December Dinah Veeris a sali cu su promer edicion cu tabata consisti di 1000 buki.

Notable tabata cu den tres siman ya tur e bukinan a worde bendi, demostrando asina e interes cu ta reina den e buki aki.

Dinah Veeris a manifesta na DIARIO cu actualmente el a saca 2000 buki y e venta di esakinan ta bayendo bon.

Recientemente Veeris a entrega un ehemplar na biblioteca na San Nicolas y e intencion ta pa entrega uno na Biblioteca Nacional.

Veeris a duna di conoce cu tin hopi mata mas cu e tin cu studia. Esaki ta encera pues cu muy pronto por spera un ro buki ariba mercado.



Esnan enteresa den e buki aki, cu ta sumamente interesante, por tuma contacto cu

Dinah Veeris na Seru Grandi 62 C, Banda Ariba Curacao na telefoon 675608.